

nouvelle Eglise.

enuoyer, deuoit il pas faire deux choses? C'est à sçauoir de les ramenteuoir, et de les enseigner? Et qu'enseigna il autre chose, que les traditions Apostoliques, que Saint Paul commande d'observer et garder, soit qu'elles ayent esté baillées ou de bouche, ou par escript? Lesquelles qui sera si outrecuidé, de les appeller traditions humaines, puis qu'elles ont esté baillées du Saint Esprit, lequel sans aucune doute est Dieu. Et qui sont ces traditions Apostoliques, sinon celles qui ont tousiours esté obseruées en l'Eglise, et nous ont esté baillées de main en main, sains faire mention par qui? comme de faire le signe de la croix, et de prier et offrir à Dieu pour les trespassez, et plusieurs autres, comme escript Tertulian, non gueres loingtain du temps des Apostres, en son liure, *De corona militis*. le m'arresteroye trop, si ie vouloye monstrier que lesdictes traditions Apostoliques ont tousiours esté autant honorées en l'Eglise de IESVS CHRIST, comme les Escritures mesmes. Car ie veux venir à ceste expresse parolle, de laquelle vous vous glorifiez si fort, et neantmoins vous allez, ce me semble, tout au contraire. Est il pas escrit expressement: que, Qui croyra et sera baptizé, il sera sauué? Et saint Paul escrit il pas, que nostre Sauueur nous a sauuez par le lauement de regeneration, et renouation du Saint Esprit? Parquoy on voit expressement, que le Baptesme est necessaire pour nostre salut. Et vous au contraire auez ceste opinion, qu'il ne fait que représenter et signifier la remission des pechez: Est ce pas allé directement contre la parole expresse? En vostre Cene desmentez vous pas IESVS CHRIST impudemment, quand il dit: Prenez et mangez, cecy est mon corps, qui est liuré pour vous. Et le calice est le nouveau Testament en mon sang, qui est respandu pour vous. Et vous dites au contraire, que le pain, signifie le corps: et le vin, le sang. Est-ce pas aultre chose d'estre, et de signifier? Or cecy est mon corps, est, est le mot expres. Et cecy signifie, est vn mot que vous tirez par force, pour seruir à vostre incredulité. Et n'y à raison du monde, pourquoy c'est est, ne se prenne en sa propre signification, comme bien monstrent les Docteurs Catholiques, à qui veult entendre la doctrine, que nous a laissé

*2 Thes. 2.*B 1^v

*Le S. esprit
est celuy
qui a en-
seigné les
traditions
apostoli-
ques.*

*Mar. 16.**Tit. 3.*B ij^r*Luc. 22.*

*Ces deux
mots, estre
et signifier,
sont de con-
traire sig-
nification.*